

आकाशवाणी

Evening Dogri (NSD) Bulletin 07-03-2025

1. प्रधानमंत्री नरेंद्र मोदी होंरें दादरा ते नगर हवेली ते दमन ते दीयू गी आदर्श राज्य च बदलने लेई सरकार आसेआ कीते गेदे जत्नें दा जिक्र कीता ऐ।
2. प्रधानमंत्री नरेंद्र मोदी होर इस म्हीने दी 11 तरीक गी मॉरीशस दे 2 रोजा दौरे पर जाडन।
3. विदेश मंत्रालय नै आखेआ ऐ जे भारत ते अमरीका द्विपक्षीय बपार समझौते पर गल्लबात गी अग्गे बदाने दी प्रक्रिया च न।
4. विदेश मंत्री डा. एस जयशंकर होंरें आखेआ ऐ जे भारत दा यूरोप कन्नै तालमेल बदेआ ऐ ते भारतीय अर्थ बवस्था च प्रगति होई ऐ।
5. ते महिला प्रीमियर लीग टी-20 क्रिकेट च अज्ज लखनऊ च गुजरात जायंट्स दा मुकाबला दिल्ली कैपिटल्स कन्नै होग।

<><><><><><>

PM-Projects

प्रधानमंत्री नरेंद्र मोदी होंरें अज्ज दमन, दीयू ते दादरा नगर हवेली दे सिलवास च दो ज्हार 587 करोड़ रपे दी बक्ख-बक्ख परियोजनाएं दा उद्घाटन कीता ते नीह पत्थर रक्खेआ। प्रधानमंत्री होंरें सिलवासा च साइडे 400 बिस्तरें दी समर्थ आहले नमो अस्पताल ते शोध सेंटर दा उद्घाटन कीता। एहदे कन्नै उनें केंद्र शासित प्रदेश च इक ज्हार 75 करोड़ रपे दी 25एं परियोजनाएं दा बी उद्घाटन कीता। प्रधानमंत्री होंरें दमन च 300 बिस्तरें दी समर्थ आहले मारवार अस्पताल दे 4 ब्लाकें दे निर्माण खानवेल च इक उपजिला अस्पताल, दमन च राष्ट्रीय जरनैली शिड़क 848 बी गी चैड़ा करने, दमन ते दीयू च 12 नमें स्कूलें दे निर्माण ते शिड़क निर्माण सरबंधी 13एं परियोजनाएं दा बी नी पत्थर रक्खेआ। प्रधानमंत्री होर 25 ज्हार कोला मते आप मदादी समूहें दी ढाई लक्ख महिलाएं गी सहायता दे तौर पर साइडे 400 करोड़ रपेआ देंगन।

<><><><><><>

PM-Mauritius Visit

प्रधानमंत्री नरेंद्र मोदी होर इस म्हीने दी 11 तरीक गी मारीशस दे 2 रोजा दौरे पर जांगन। विदेश मंत्रालय दे प्रवक्ता रणधीर जायसवाल होंरें अज्ज नमीं दिल्ली च समाचार माध्यमें गी जानकारी दिंदे होई आखेआ जे प्रधानमंत्री होर 12 मार्च गी मारीशस दे राष्ट्रीय ध्याड़े पर लग्गने आहले प्रोग्राम च मुख परौहने दे तौर पर शामिल होंगन। भारतीय नौसेना दे इक समुंद्री जहाज समेत भारतीय रक्षाबलें

दा इक दल इस समारोह च शामिल होग। प्रधानमंत्री होर इस दौरै दौरान मारीशस दे राष्ट्रपति ते प्रधानमंत्री हुंदे कन्नै मुलाकात करंगन।

<><><><><><>

Heath Min. Jan Aushadhi

केंद्री सेहत मंत्री जगत प्रकाश नड्डा होरें आखेआ ऐ जे प्रधानमंत्री जन औषधि परियोजना 'अच्छी बी सस्ती बी' दे मंत्र कन्नै सब्भने लेई सेहत दी हिफाजत तोड़ी पुज्जत बनाने च क्रांतिकारी तब्दीली आहना करदी ऐ। जन औषधि दिवस दे मौके पर अपने सनेह च श्री नड्डा होरें आखेआ जे मुल्खै च 15 जहार कोला मते जन औषधि केंद्र रोज ध्याड़ी लक्खां लोकें दी सेवा करा करदे न। इनें केंद्रें पर उपलब्ध दवाइयें पर 50 कोला 90 फीसदी तोड़ी दी छूट दिती जा करदी ऐ। नड्डा होरें प्रधानमंत्री भारतीय जन औषधि परियोजना दा जिक्र करदे होई आखेआ जे एह पैहल एह यकीनी बनांदी ऐ जे हर इक भारतीय गी लोडचदियां सेहत सेवां उपलब्ध होन। केंद्री सेहत राज्यमंत्री अनुप्रिया पटेल होरें आखेआ जे प्रधानमंत्री भारतीय जन औषधि परियोजना सस्ती ते गुणवत्ता आहली दवाइए दे नमें मानक तय करा करदी ऐ। उनें आखेआ जे एह पैहल करोड़ां बद्दे लोकें दे जीवन गी बेहतर बनाइयै सेहत दे खेतर च वरदान साबित होई ऐ।

<><><><><><>

Aircraft Crash

भारतीय ब्हाई सेना दा इक जगुआर विमान अज्ज अम्बाला च हादसे दा शिकार होई गेआ। भारतीय ब्हाई सेना मुताबक एह हादसा इक्क आम सिखलाई आहली डोआरी दौरान सिस्टम च खराबी आने मगरा होआ। पाइलट विमान गी रिहायशी इलाके सवां सुरक्षित बाहर कड्डने च कामयाब होआ। हादसे दे कारणें दा पता लाने दे आदेश दिते गेन।

<><><><><><>

Ministry of External Affairs

विदेश मंत्रालय नै अज्ज आखेआ ऐ जे भारत ते अमरीका कई खेतरें च द्विपक्षीय बपार सरबन्धी समझौते पर गल्लबात गी अग्गे बदाने दी प्रक्रिया च न। अज्ज नमीं दिल्ली च समाचार माध्यमें गी जानकारी दिंदे होई विदेश मंत्रालय दे प्रवक्ता रणधीर जायसवाल होरें आखेआ जे पिछले म्हीने प्रधानमंत्री नरेंद्र मेदी हुंदी अमरीका दे फायदे, बक्ख-बक्ख खेतरें सरबन्धी द्विपक्षीय बपार समझौते पर गल्लबात करने दी योजना बारै घोषणा कीती ही।

<><><><><><>

EAM

विदेश मंत्री डॉ. एस जयशंकर होरें आखेआ ऐ जे मौजूदा समें च भारत दा यूरोप कन्नै तालमेल बदेआ ऐ ते भारती अर्थ बवस्था च प्रगति होई ऐ। जयशंकर होरें अज्ज यूनिवर्सिटी कॉलेज इबलिन च अपने भाषण च एह गल्ल आकखी। उनें हाल च यूरोपियन कमीशन दिएं अध्यक्ष उर्सुला वॉन डेर लेयेन हुंदे आसेआ 21एं कमीशनरें कन्नै लाए गेदे भारत दे तौरै गी चेता कीता। उनें आखेआ जे भारत ते यूरोपी यूनियन तकरीबन 23एं बरें थमां मुक्त बपार समझौते बारै गल्लबात करा करदे न। उनें मेद जाहिर कीती जे इस बरे दे खीरै तोड़ी एहदे बारै प्रक्रिया पूरी होई जाग। मंत्री होरें आखेआ जे भारत 5मीं सब्भनें कोला बड्डी अर्थ बवस्था ऐ ते इस दहाके दे खीरै तोड़ी भारतीय अर्थ बवस्था त्री सब्भनें कोला बड्डी अर्थ बवस्था बनी जाग। दौनें मुखे बशकार आपूंचै दे सरबंधें दा जिक्र करदे होई डॉ. जयशंकर होरें आखेआ जे दौनें बशकार कारोबारी सरबंध बडे मजबूत न ते मौजूदा समें च दौनें बशकार 16 अरब पाउंड दे कारोबार दा अनुमान ऐ।

<><><><><><>

CM Budget

मुख्यमंत्री ओमर अब्दुल्ला होरें अज्ज जम्मू-कश्मीर विधानसभा च 2025-26 आहले बरे लेई 1 लकख 12 ज्हार करोड़ रुपें दा सिफर घाटे आहला बजट पेश कीता। इस बजट च केन्द्र शासित प्रदेश दे चबकखे विकास पर चेचा बल दिता गेआ ऐ। नेशनल कांफ्रेंस दी अगुवाई आहली सरकार च मुख्यमंत्री ओमर अब्दुल्ला हुंदे कश खजाना मैहकमे दी बी जिम्मेदारी ऐ ते उनें अज्ज विधानसभा च अपनी इस सरकार दा पैहला-पैहला बजट पेश कीता। इस मौके पर मते सारे सदस्ये जबरदस्त ढंगेनै ताड़ियां बजाइयै उंदा अभिवादन कीता। ओमर अब्दुल्ला होरें अपने भाषण दी शुरु करदे होई आखेआ जे खजाना मंत्री दे तौर उप्पर अज्ज ओह अपना पैहला बजट पेश करै करदे न ते एह पिच्छले 7एं बरें च पेश कीता गेदा पैहला बजट बी ऐ। उनें आखेआ जे नेह महत्वपूर्ण समें उप्पर जम्मू-कश्मीर दे खजाना मैहकमे दी कमान सांभना इक बड़ी बड्डी जिम्मेदारी ऐ ते इस जिम्मेदारी गी निभाना उंदे लेई बडे मानै आहली गल्ल ऐ। ओमर होरें आखेआ जे एह बजट इक नमें ते खुशहाल जम्मू-कश्मीर लेई रुपरेखा आहला दस्तावेज ऐ जेहड़ा जम्मू-कश्मीर दे लोके दिएं आसैं-तांगें गी दर्शाने दे कन्नो-कन्नी आर्थिक विकास, समाजी तरक्की ते टिकाउ विकास लेई इक मजबूत बुनियाद बी रकखै करदा ऐ।

<><><><><><>

Budget Welfare Measures

मुख्यमंत्री ओमर अब्दुल्ला होरें अज्ज केन्द्र शासित प्रदेश जम्मू-कश्मीर दा बजट पेश करदे होई केई कल्याणकारी हीलें दा बी ऐलान कीता जिंदा मकसद कमजोर तबके दे जीवन-स्तरै गी बेहतर बनाने सने महिलाएं दा सशक्तिकरण ते शिक्षा दे खेतर गी तगड़ा बनाना बी ऐ। आकाशवाणी दे जम्मू संवाददाता दी रिपोर्ट मूजब, जम्मू-कश्मीर सरकारै बजट च, अन्तोदया अन्न योजना तैहत औने आहले सब्भनें परोआरें लेई 200 युनिट मुफ्त बिजली दा ऐलान कीता ऐ। एहदे अलावा, अन्तोदया अन्न

योजना दे सब्भनें लाभार्थिं गी औंदी पैहली अप्रैल थमां हर म्हीने 10 किलो मुफ्त राशन थहोआ करोग जेहदे'नै समाज दे आर्थिक तौर उप्पर कमजोर तबके उप्पर पौने आहले माली भार गी घट्ट करने च मदाद थहोग। इस्से चाल्ली गरीब कुड़िं दे ब्याहें च मदाद आहली योजना दे तैहत दिती जाने आहली रकम गी 50 जहार रपें शा बधाइयै 75 जहार रपे करने दा ऐलान बी अज्जै दे बजट च कीता गेआ ऐ। महिला सशक्तिकरण दे लेहाज कन्ने बजट च जेहड़ा इक होर बड्डा ऐलान कीता गेआ ऐ ओहदे मूजब, जम्मू-कश्मीर च सब्भै महिलां, औंदी पैहली अप्रैल थमां सरकारी बस्सें सने ई-बसें च बी मुफ्त सफर करी सकडन। प्रदेश दे लोके गी पीने आहला साफ पानी उपलब्ध करोआना जकीनी बनाने दे मकसद कन्ने सरकार, इस ब'रे जम्मू-कश्मीर दे बक्ख-बक्ख हिस्सें च पानी दी जांच आहिलियां 98 लैबाटरियां खडेरोग। इस गैह कन्ने पानी दी गुणवत्ता च सुधार होग। बजट च इक होर बड्डी घोषणा करदे होई ओमर अब्दुल्ला होरें खिते च कन्नू दी पढ़ाई लेई नेशनल लॉ युनिवर्सिटी स्थापित करने दा ऐलान बी कीता ऐ ते एहदे लेई बजट च 50 करोड़ रपे बक्खरे रक्खने दी तजवीज़ कीती गई ऐ।

<><><><><><>

Saffron

राई-बाई मैहकमे दे मंत्री जावेद अहमद डार होरें अज्ज आखेआ ऐ जे किश्तवाड़ जिले च केसर सरबंधी राश्ट्री मिशन दे तैहत 50 कमांस जिमीं गी नमें सिरेया तैयार कीता गेआ ऐ। आकाशवाणी दे जम्मू संवाददाता दी रिपोर्ट मूजब, मंत्री होर विधानसभा च सुनील कुमार शर्मा हुंदे आसेआ पुच्छे गेदे इक सोआलै दा परता देआ करदे हे। उ'नें दस्सेया जे करसानें गी बक्ख-बक्ख खेतरें च माली ते तकनीकी सैहयोग बी दिता गेआ ऐ। मंत्री होरें दस्सेआ जे इस जिमीं दे कायाकल्प लेई 5 जहार 465 लाभार्थिं गी माली सहायता दिती गई। इस पूरे मिशन दे तैहत करसानें गी 2 करोड़ 52 लक्ख 86 जहार रपें दी सब्सिडी बी उपलब्ध करोआई गई ऐ। मंत्री होरें गलाया जे केसर सरबंधी राश्ट्री मिशन दे तैहत करसानें गी सिखलाई देने गितै 10 कैप लोआए गे ते द'ऊं दिनें दे अंदर तकरीबन 250 करसानें गी लोडचदी सिखलाई दिती गई।

<><><><><><>

Ito Cancer Treatment

सेहत ते मेडिकल शिक्षा मंत्री सकीना इत्तू होरें अज्ज आखेआ ऐ जे जम्मू-कश्मीर च कैंसर दा पता लाने ते एहदे इलाज लेई सेहत सरबंधी ढांचे दा दर्जा बधाया जा'रदा ऐ। मंत्री होर विधानसभा च विधायक तनवीर सादिक हुंदे आसेआ पुच्छे गेदे सोआलै दा परता देआ करदिआं हि'आं। उ'नें दस्सेआ जे आबादी आधारित कैंसर रजिस्ट्री मूजब, 2018 थमां 2024 बश्कार कश्मीर च कैंसर दे 50 जहार 551 मामले ते जम्मू संभाग च 13 जहार 912 मामले दर्ज कीते गे। उ'नें इब्बी गलाया जे हर ब'रे इ'नें मामलें च 2 फीसद शा 3 फीसद तगर दा बाददा दिक्खने गी लब्भै करदा ऐ। मंत्री होरें दस्सेआ जे जम्मू-कश्मीर च कैंसर दे मरीजें गी स्किम्स श्रीनगर ते जीएमसी जम्मू च माहिराना इलाज दिता जा'रदा ऐ। उ'नें इब्बी जानकारी दिती जे स्टेट कैंसर इंस्टीच्यूट जम्मू च 3 आपरेशन थेटरें ते 10 बिस्तरें आहले आईसीयू दा निर्माण कम्म मेद ऐ जे इस म्हीने दे अखीरै तोहड़ी सबूरा होई जाहग।

<><><><><><>

Budget PDP

पीपुल्स डेमोक्रेटिक पार्टी नै विधानसभा च अज्ज पेश कीते गेदे बजट दी सख्त निंदेआ करदे होई नेशनल कांफ्रेंस दी अगुवाई आहली सरकार उप्पर लोके कन्नै चुनाएं दरान कीते गेदे वायदें गी पूरा करने च नाकाम रौहने दा दोष लाया ऐ। आकाशवाणी दे जम्मू संवाददाता दी रिपोर्ट मूजब, पीडीपी नै आखेआ ऐ जे बजट नै नेशनल कांफ्रेंस दे चुनावी घोषणा पत्र ते ओहदी सरकार दे बश्कार दी बड्डी बित्थ गी सब्भनें दे सामने लेई आंदा ऐ। पीडीपी नै आखेआ ऐ जे नेशनल कांफ्रेंस नै सब्भनें गी 200 युनिट मुफ्त बिजली देने दा वायदा कीता हा पर हून उन्नै एह फैसला छड़ा अंतोदया अन्न योजना दे लाभार्थिएं लेई गै अमल च आहन्नेआ ऐ। पीडीपी नै आखेआ जे जम्मू-कश्मीर च 16 लक्ख शा मते राशनकार्ड धारक न जिंदे चा छड़े 95 जहार गी गै इस योजना दा लाह थोग ते एह कुल आबादी दा छड़ा 5 शा 7 फीसद हिस्सा गै बनदा ऐ। पीडीपी नै नेशनल कांफ्रेंस उपपर लोके दे विश्वास गी त्रोड़ने दा आरोप लांदे होई आखेआ ऐ जे बजट दे ऐलान कोला पैहले अंतोदया अन्न योजना दे कुल लाभार्थिएं चा 1 लक्ख 27 जहार लोके गी हटाई दिता गेआ जेहड़ा सरकार दी मंशा उप्पर सोआल खड़े करदा ऐ।

<><><><><><>

Budget Highlights

ओमर अब्दुल्ला हुंदे आसेआ अज्ज पेश कीते गेदे बजट च रोजगार, उच्च शिक्षा ते खेड्डे सरबंधी खेतरें बक्खी चेचा ध्यान दिता गेआ ऐ। सरकारै ऐलान कीता ऐ जे भर्थिएं दे कम्मै च तेजी आंदी जाहग ते ध्याडीदारें दे मसले हल करने लेई बी विचार कीता जा'रदा ऐ। उ'नें गलाया जे जेके-पीएससी ते जेके-एसएसबी आसेआ कीती जाने आहली भर्थी प्रक्रिया गी तेज कीता जाहग। ई'आं गै स्कूली ते उच्च शिक्षा दे खेतरें लेई 1 जहार 388 करोड़ 97 लक्ख रुपें दी तजवीज़ कीती गई ऐ। 2024-25 ब'रे लेई कीती गेदी तजवीज़ शा एह 242 करोड़ 75 लक्ख रुपे बद्ध ऐ। तोआई अज्जै दे बजट च जम्मू-कश्मीर च खेड्डे ढांचे गी तगड़ा बनाने बक्खी टकोहदा ध्यान दिता गेआ ऐ। इस सरबंधे च एह ऐलान कीता गेआ ऐ जे डल झील ते बसोहली इलाके च पानी आहिलएं खेड्डे मतल्लक केन्द्र बनाए जाडन। एहदे अलावा राजबाग ते खेल गांव, कन्डोली नगरोटा जम्मू च जिमनास्टिक अकैडमी, प्रदेश च 4 क्रिकेट अकैडमियां, 2 यूथ होस्टल ते हर इक जिले च खरी कारकरदगी आहले सिखलाई केन्द्रें दे निर्माण दा बी ऐलान अज्ज पेश कीते गेदे बजट च कीता गेआ ऐ।

<><><><><><>

Syria

सीरिया च समुंद्री कंडे आहले सूने लताकिया च सीरियाई सुरक्षाबलें ते ओहदे पर नेई रेदे शासक बशर अल असद हुंदे बफादार बंदूकधारियें बशकार होई दियें हिंसक झडफें च 70 कोला मते लोकें दी मौत होई गेई ऐ। इंदे च 16 सुरक्षाकर्मी बी शामिल न। इनें झडफें च कई लोक घायल बी होई गेदे न।

<><><><><><>

Cricket

महिला प्रीमियर लीग टी-20 क्रिकेट च अज्ज लखनऊ च संझा साइडे सत बजे गुजरात जायंट्स दा मुकाबला दिल्ली कैपिटल्स कन्नै होग। जंदी संझा इस्सै थाहर खेड्डे गेदे मुकाबले च मुम्बई इंडियन्स नै यू.पी वारियर्स गी 6एं विकटें कन्नै हराई दिता हा।

<><><><><><>